

SURANA YAHYA MOBHAA-BHAANA

POGAU BHAA-BHAANA

Surana Yahya Mobhaa-bhaana atoburi tee rua angu makusudu. Bhaa-bhaana, to apekaogeaka incana manga mia mobacea mamudhaakana manga incia adhadhi aposaangu tee Aulata'ala tee Anana siitumo Isa Al Masi. Juaaka, to audhaniaka manga incia mamudhaakana inda aose manga kaadhari mosala momembalina mopekadhakina posaanguana manga incia tee Aulata'ala tee Isa Al Masi. Manga kaadhari mosala sumai asandaraakea minaaka i kaparacaea opeapo uka mopokaina tee dunia akohasiliaka giu momadhaki; jadi o Isa Anana Aulata'ala inda amungki amembali maanusia. Manga guru moadhariakana manga kaadhari mosala sumai apogau, ande tatopasalaamati ma'anana talapa minaaka i manga urusana dhadhi i dunia sii; manga incia aadhariaka uka ande o kasalaamati inda tee pokaiana tee manga giuna pebula atawa o kaasi tee maanusia rangata.

Aposala tee manga kaadhari incia sumai, moburina sura incia sii atinda mpuu apogauakea ande o Isa Al Masi ampuu-mpuu amembalimo maanusia satotuuna. Incia uka mangaudhaniaka mpuu ande bhari-bharia mia moparacaeana tee Isa tee momaasiakana Aulata'ala tabeana apo-maamaasiaka uka tee maanusia rangana.

Antona

Porikanaana pogau 1:1-4

Kainawa tee kalalanda 1:5--2:29
 Manga anana Aulata'ala tee manga anana Ibil-
 isi 3:1-24
 Mobanarana tee mosalana 4:1-6
 Awaajibu to tamaasi 4:7-21
 Kaparacaea mangapamembalina takana 5:1-21

Kasakusiina Rasulu to Firimani Idhadhiaka
 1:1-4

¹ Antona sura incia sii pokaiana tee Firimani modhawuna dhadhi, siitumo Firimani modhaangiana minaaka i piamo itu auwalina dunia sii indapo atopadhaangia. Ingkami padhamo tarangoa tee takamatea, opea mopadhana iton-tomami sumai padhamo takenia tee limamami.

² Satotuuna o dhadhi sumai padhamo atopatiumba* tee ingkami padhamo takamatea. Rampaakanamo sumai sii-sii ingkami tadhawu kasakusii tee tapakoleleakakomiu pokaiana tee giu mopamembalina mia adhadhi abakaa. Dhadhi sii apobhawa tee Aulata'ala o Amata, tee kasiimpo atopatiumba to ingkita.

³ Jadi, opea mopadhana ikamatamami tee irangomami sumai, siitumo uka ipakoleleakamami to ingkomiu, mamudhaakana uposaangu tee ingkami, mboomo ingkami taposaangu tee Aulata'ala o Amata tee Isa Al Masi o Anana Aulata'ala.

1:1 1:1 Yah. 1:1. 1:2 1:2 Yah. 1:14. * 1:2 1:2 *dhadhi sumai padhamo atopatiumba*: Yahya aburi ande incia tee manga rasulu amembali sakusii to opea ipewauna Isa wakutuuna Incia adhadhi i dunia sii.

⁴ Rampaakanamo sumai ingkami taburi sura incia sii to ingkomiu, mamudhaakana amondo kaunde-undeta.[†]

Aulata'ala Satotuuna o Kainawa
1:5-10

⁵ Siimo lele mopadhana irangomami minaaka i Isa Al Masi tee sii-sii ingkami tapakawaakea to ingkomiu: Aulata'ala sumai o kainawa tee i nuncana karona inda tee kalalanda sampeampearo.

⁶ Ande ingkita tapogau taposaangu tee Aulata'ala, garaaka ingkita dhaangiapo mboomo mia moosena dhala momalalanda, ma'anana ingkita tagau-gau tee inda tapewau kabanara.

⁷ Maka ande taose dhala momainawa mopokanana tee Aulata'ala momainawana, sumaimo ingkita sadhaadhaa taposaangu tee manga witinaita mosa'iimani, tee o raana Isa o Anana Aulata'ala, mangapekangkiloni minaaka i bhari-bharia dosata.

⁸ Ande ingkita tapogau inda takodosa, sato-tuuna ingkita tagau-gau karota, tee o kabanara sumai inda dhaangia i ingkita.

⁹ Maka ande ingkita ta'akui manga dosata, sumaimo o Aulata'ala momembalina motoparacaea tee mobanara sumai, bhea'amponia manga dosata tee mangapekangkilo minaaka i bhari-bharia kadhaki.

¹⁰ Ande ingkita tapogau ande indapo mina tapewau dosa, sumaimo ingkita taabhi Aulata'ala agau-gau tee firimanina inda dhaangia i nuncana ngangarandata.

[†] **1:4 1:4** *amondo kaunde-undeta*: Dhaangia uka manga kaburi mangenge motoburina "amondo kaunde-undemiu."

2

Isa Motulungina Ingkita

2:1-6

¹ E manga anaku imaasiakaku, iaku kuburi sura incia sii to kuudhaniakakomiu mamudhaakana bholi upewau dosa. Maka ande dhaangia o mia mopewauna dosa, udhania ande dhaangia tee momangatulungina i aroana Ama, siitumo o Isa Al Masi, Mobanarana.

² Isa padhamo apasarakaaka karoni to mangapapomalape tee Aulata'ala mamudhaakana a'amponi manga dosata. Tee inda soo dosata, maka to bhari-bharia dosana miana dunia sii uka.

³ Ande ingkita tata'ati tee manga parintana Aulata'ala siitumo tandana ande ingkita tamatau Aulata'ala.

⁴ Mia mopogauna "Iaku kumataua o Aulata'ala," maka incia inda ata'atia manga parintana, siitumo o mia mogau-gau tee kabanara inda dhaangia i incia.

⁵ Maka incema mota'atina firimanina Aulata'ala, i nuncana dhadhina mia incia sumai Aulata'ala atotuu-totuu apabukea o ngangarandana tee kaasi. Roonamo ingkita taose firimanina Aulata'ala, apamembali ingkita tayaakini ande ingkita taposaangu tee Incia.

⁶ Jadi, incemapo uka mopogauna ande incia aposaangu tee Aulata'ala, incia tabeana aose pemingkuina Al Masi.

Parinta Mobhaau

2:7-17

⁷ E manga witinaiku imaasiakaku, mencuana parinta mobhaau iburiku sii to ingkomiu, maka o parinta momangenge, roonamo ingkomiu padhamo urangoa kaadhari incia sii minaaka i bhaa-bhaana.

⁸ Moomini mboo sumai, iaku kuburiakakomiu uka saangu parinta bhaau, roonamo atotuu-totuu amembali atokamata i karona Isa Al Masi tee i karomiu. Roonamo kalalanda apepuumo aila tee o kainawa mobanara apepuumo akocahaea.

⁹ Incema-incema mopogauakana ande o karona dhaangia i nuncana kainawa, maka incia abanci witinaina, ma'anana sakawana sii-sii incia dhaangiapo amboore i nuncana kalalanda.

¹⁰ Mia momaasiakana witinaina sa'iimani atan-tumo adhadhi i nuncana kainawa, tee i nuncana karona inda dhaangia saangu giu uka to apasal-adhala mia.

¹¹ Maka incema mobancina witinaina mosa'iimanina, incia amboore i nuncana kalalanda tee adhala i nuncana kalalanda. Incia inda amataua iapai o lingkaana, roonamo kalalanda sumai padhamo apekawiloa.

¹² E manga anaku imaasiakaku, iaku kuburiakakomiu sura incia sii,
roonamo bhari-bharia dosamiu
a'amponimea o Aulata'ala rampaakanamo
sarona Isa.

¹³ E manga ama, iaku kuburiakakomiu,
rampaakanamo umataumea o Aulata'ala mi-
naaka i auwalina.

E manga umane mangura, iaku kuburiakakomiu,

roonamo upekatalo Momadhakina, siitumo Ibilisi.

E manga ana imaasiakaku, iaku kuburi-
akakomiu,
roonamo umataumea o Ama.

¹⁴ E manga ama, iaku kuburiakakomiu,
roonamo umataumea o Aulata'ala modhaan-
giana minaaka i auwalina.

E manga ana umane mangura, iaku kuburi-
akakomiu,
roonamo ingkomiu umatangka,
tee firimanina Aulata'ala amboore i nuncana
karomiu,
tee utalomo Momadhakina, siitumo Ibilisi.

¹⁵ Bholi dhaangia o kaasimiu to dunia sii atawa
opeapo uka modhaangiana i nuncana dunia.
Ande samia o mia momaasiakana manga giu
modhaangiana i dunia, ma'anana incia inda
amaasiaka o Ama.

¹⁶ Roonamo bhari-bharia modhaangiana i nun-
cana dunia sii mangapekaridho tee Aulata'ala, si-
itumo kapeeluana bada, kapeeluana mata, tee ka-
sombo rampaakanamo manga harataata. Manga
giu incia sumai mencuana mominaakana i Ama,
maka aminaaka i dunia.

¹⁷ Dunia sii tee bhari-bharia giu ipeeluna mia
i dunia padhaaka amofumo, maka incemapo
uka moosena kapeeluana Aulata'ala sadhaadhaa
adhadhi sa'umuraa.

Moewangina Al Masi

2:18-27

¹⁸ E manga anaku imaasiakaku, siimo aahirina
zamani mboomo mopadhana irangomiu ande

mobhalina Al Masi bheaumba naile itu. Tee sii-sii abharimo mobhalina Al Masi mopatiumbana karona. Rampaakanamo sumai ingkita tabeana tamataua ande o siimo satotuuna aahirina zamanani.

¹⁹ Manga incia alimba minaaka i tanga-tangata, roonamo manga incia mencuana moposaanguna tee ingkita, roonamo ande manga incia aposaangu tee ingkita tantumo bheasadhaadhaa apobhawa-bhawa tee ingkita. Sumaimo manga incia agaati karona mamudhaakana abukuti-iakea ande manga incia bhari-bharia mencuana moposaanguna tee ingkita.

²⁰ Maka ingkomiu padhamo utarima Rohina Aulata'ala mominaakana i Momangkilona* tee siitumo mbakanamo bhari-bharikomiu umataua o kaadhari mobanara.

²¹ Jadi iaku kuburi giu incia sii to ingkomiu mencuana roonamo ingkomiu inda umatau kaadhari mobanara, maka rampaakanamo ingkomiu umataumea, tee ingkomiu uka umataua ande inda dhaangia o kagau-gau i nuncana kaadhari mobanara sumai.

²² Incema buaka o pande gau-gau sumai? Buaka mencuana incia mopesapuakana ande Isa mencuana Al Masi? Siimo manga mia mobhalina Al Masi, siitumo manga incia inda mo'akuina o Ama tee o Anana Ama.

²³ Incema-incema inda mo'akuina ande o Isa satotuuna o Anana Aulata'ala ma'anana incia inda aposaangu tee Ama. Tee incema-incema

* **2:20 2:20***Momangkilo:* Inda atomatau ande Momangkilona sumai ma'anana o Isa atawa o Aulata'ala.

mo'akuina Ana, ma'anana incia atarima Ama uka.

²⁴ Rampaakanamo sumai, opea mopadhana irangomiu tee iparacaeamiu minaaka i auwalina tabeana udhikaia pekalape i nuncana ngangarandamiu, mamudhaakana ingkomiu sadia uposaangu tee Anana Aulata'ala tee uka o Ama.

²⁵ Siimo ijanjiakana Isa to ingkita moposaangua tee Incia, siitumo ingkita bhetadhadhi sa'umuraa.

²⁶ Iaku kuburiakakomiu bhari-bharia giu incia sii roonamo dhaangia tee manga mia mo'usahana mopasaladhalakomiu.

²⁷ Maka i nuncana karomiu asadhaadhaa dhaangia tee Rohina Aulata'ala. Jadi ingkomiu indamo ufaraluu samia guru uka to moadharikomiu, roonamo Rohina Aulata'ala itari-mamiu sadia aadhariakakomiu bhari-bharia giu ifaraluumiu tee o kaadharina sumai abanara, mencuana kagau-gau. Jadi rampaakanamo sumai ingkomiu sadiamo uta'ati tee opea iadhariakana o Rohina Aulata'ala sumai, tee sadiamo ingkomiu usadhaadhaa udhadhi uposaangu tee Al Masi.

Manga Anana Aulata'ala

2:28--3:10

²⁸ E manga anaku, sii-sii umbooremo uposaangu tee Al Masi mamudhaakana ande Incia naile itu aumba, ingkita tabarani tee inda tamaea i aroana.

²⁹ Ingkomiu umataua ande Incia sadia abanara, sumaimo ingkomiu uka umataua ande o mia apewau giu mobanara, incia padhamo atarima dhadhi mobhaau minaaka i Aulata'ala.

3

¹ Kamatea! Tapanamo kaoge o kaasi id-hawuakana Ama to ingkita, sabutuna tatosarongi manga anana Aulata'ala, tee inciamo ingkita o anana Aulata'ala! Rampaakanamo sumai o dunia sii inda mangamatau, roonamo dunia uka inda apomatau tee Aulata'ala.

² E manga witinai imaasiakaku, sii-sii ingkita o anana Aulata'ala, maka indapo atomatau naile itu tuaapa o kadhaangiata. Moomini mboo sumai, ingkita tamataua ande o umbaana Al Masi naile itu, ingkita tamembali mboomo Incia, roonamo bhetakamata Incia mboomo kadhaangiana mosatotuuna.

³ Incema moharapuna mboo sumai tee Incia, incia apekangkilo karona, tee apokana mboomo Al Masi uka amangkilo.

⁴ Incema mopewauna dosa, sumaimo incia inda ata'ati hukumuna Aulata'ala, roonamo mopewauna dosa apokana tee adorohaka tee Aulata'ala.

⁵ Ingkomi uataua ande o Al Masi aumba i dunia sii to ahapusu manga dosana maanusia, tee inda dhaangia o dosa i nuncana karona.

⁶ Rampaakanamo sumai, ande tee mia mosadhaadhaana adhadhi aposaangu tee Al Masi, incia atantumo inda bheatorotorosu apewau dosa. Incema motorotorosuna mopewauna dosa, satotunu incia indapo akamata tee amatau Al Masi.

⁷ E manga anaku imaasiakaku, bholi apasalahalakomiu incemapo uka. Incema mopewauna

kabanara satotuuna abanara, mboomo uka Al Masi abanara.

⁸ Mia mopewauna dosa aminaaka i Ibilisi, roonamo minaaka i auwalina o Ibilisi apewau dosa. Rampaakanamo sumai o Anana Aulata'ala aumba, to apahancuru pewauna Ibilisi.

⁹ Bhari-bharia mia mopadhana motarimana dhadhi bhaau minaaka i Aulata'ala atantumo inda atorotorosu apewau dosa, roonamo sifatuna Aulata'ala amboore i nuncana karona. Incia inda amembali atorotorosu apewau dosa roonamo incia alaahiri minaaka i Aulata'ala.

¹⁰ Tee mboo sumai, atindamo posalana manga anana Aulata'ala tee manga anana Ibilisi: incema-incema inda mopewauna kabanara atawa inda momaasiakana witinaina, incia mencuana anana Aulata'ala.

Tamaasiaka Manga Witinaita Amembali Tandan Dhadhi Bhaau
3:11-18

¹¹ Roonamo mboomo sumai o kasamea mopadhana irangomiu minaaka i auwalina, siitumo ingkita tabeana tapomaamaasiaka;

¹² mencuana mboomo Kabil* momembalina anana Ibilisi tee apekamate andina karona. Opea o sababuna incia apekamate andina? Sababuna o Kabil apewau manga giu momadhaki, maka o andina apewau manga giu mobanara.

3:11 3:11 Yah. 13:34. **3:12 3:12** Bhaa. 4:8. * **3:12 3:12**
Kabil: Atosarongi uka Kain; incia o anana bhaa-bhaana Adamu tee Hawa, tee o andina akosaroaka Habil.

¹³ Rampaakanamo sumai, e manga witinaiku, bholi umente ande ingkomiu abancikomiu manga miana dunia sii.

¹⁴ Ingkita tamataua ande talimbamo minaaka i mate, tee sii-sii tapindamo i nuncana dhadhi. Giu incia sumai tamataua roonamo tamaasiaka manga witinaita. Mia inda momaasiakana witi-nai rangana apokana tee mia mate.

¹⁵ Incema mobancina witinaina, incia sato-tuuna o pande pekamatena mia, tee ingkomiu umataua ande o mia mboo sumai inda apotib-haaka dhadhi mobakaa.

¹⁶ Tee mboo sumai ingkita tamataua o ma'anana kaasi, mboomo Isa padhamo apasaraakaaka inyawana to ingkita. Sumaimo ingkita uka alaenga tapasaraakaaka inyawata to manga witinaita.

¹⁷ Incema-incema mokoharataana i dunia, maka wakutuuna incia akamata witinaina akakuranga incia inda amaasi incana, tuaapa amembali o kaasina Aulata'ala amboore i nuncana karoni mia incia sumai?

¹⁸ E manga anaku, bholi tangkanamo soo dhe-lata atawa soo pogauta ande ingkita padhamo tamaasiaka manga witinaita, maka tabeana tape-waua tee kabanara.

Kayaakini i Aroana Aulata'ala

3:19-24

¹⁹ Tee mboo sumai, ingkita tamataua ande o asalata aminaaka i kabanara. Rampaakanamo sumai amembali tapayaakini ngangarandata i aroana Aulata'ala i nuncana tado'a;

²⁰ roonamo ande o ngangarandata manga-pasala, tamataua uka Aulata'ala alabhi o kaogena minaaka i ngangarandata tee bhari-bharia giu amataua.

²¹ E manga witinai imaasiakaku, ande o ngangarandata inda mangapasala, sumaimo ingkita tamembali tapoaro tee Aulata'ala alaloi do'a tee inda tanamisi kaeka,

²² tee opeapo uka iemanita, ingkita tapotib-haakea minaaka i Incia, roonamo ingkita tata'ati bhari-bharia parintana Aulata'ala tee tapewaua opea ipeeluna.

²³ Siimo parintana Aulata'ala, mamudhaakana ingkita taparacaea tee sarona Isa Al Masi, siitumo o Ana moumbana minaaka i Aulata'ala, tee tapomaamaasiaka mboomo iparintaakana to ingkita.

²⁴ Mia mota'atina manga parintana adhadhi aposaangu tee Aulata'ala, tee Aulata'ala aposaangu uka tee manga incia. Tee mboo sumai ingkita tamataua ande o Aulata'ala aposaangu tee ingkita, roonamo Incia padhamo mangadhawu Rohina to ingkita.

4

Rohina Aulata'ala tee Rohi Mobhalina Al Masi 4:1-6

¹ E manga witinai imaasiakaku, bholi uparacaea tee bhari-bharia mia momangakuna atarima rohi minaaka i Aulata'ala, maka tabeana uujia manga rohi sumai aminaaka i Aulata'ala atawa inda, roonamo dunia sii abukeaka tee nabii gau-gau molingkana i iapai-iapai.

² Siimo sala saangu cara to uujiaka rohi sumai ande atotuu Rohina Aulata'ala atawa inda. Ande o rohi sumai a'akui Isa Al Masi padhamo aumba i dunia amembali maanusia, siitumo rohi asalana aminaaka Aulata'ala.

³ Maka manga rohi inda mo'akuina Isa, asalana inda aminaaka i Aulata'ala. Rohi incia sumai satotuuna manga rohi mobhalina Al Masi. Ingkomiu padhamo urangoa ande naile itu manga incia bheaumba, tee sii-sii manga incia adhaangiamo i nuncana dunia sii.

⁴ E manga ana imaasiakaku, asalamiu minaaka i Aulata'ala tee ingkomiu padhamo utalo manga nabii gau-gau sumai, roonamo Rohi modhaangiana i nuncana karomi alabhi o kaogena minaaka i rohi modhaangiana i nuncana dunia.

⁵ Asalana manga incia minaaka i dunia; rampaakanamo sumai, manga incia tangkanamo apogauaka giu mopokaina tee dunia, tee o dunia uka asana aperangoi manga incia.

⁶ Sainamo, Ingkita sii o asalata aminaaka i Aulata'ala, tee o mia momatauna Aulata'ala bheamangaperangoi, sainamo mia inda mominaakana i Aulata'ala inda bheamangaperangoi. Tee cara mboo sumai ingkita tamembali tamataua o posalana mia mokorohiakana kabana atawa rohi mopasaladhalana.

Aulata'ala sumai o Kaasi
4:7-21

⁷ E manga witinai imaasiakaku, maimo ingkita tapomaamaasiaka roonamo kaasi sumai aminaaka i Aulata'ala tee incema momaasina,

incia padhamo atarima dhadhi bhaau minaaka i Aulata'ala tee amatau Aulata'ala.

⁸ Mia inda momaasina tee mia mosagaanana sumaimo incia inda bheamatau Aulata'ala roon-amo Aulata'ala sumai o kaasi.

⁹ Aulata'ala apatokamataaka ande Incia amaasi tee ingkita tee cara alamboko Anana Sakarokarona i nuncana dunia sii mamudhaakana ingkita tapotibhaaka dhadhi mobakaa alaloi Anana sumai.

¹⁰ Mboo siimo kaasi sumai, mencuana ingkita mobhaa-bhaana momaasiakana Aulata'ala, maka Inciamo momaasiakana ingkita tee alamboko Anana amembali kurubani to manga dosata, mamudhaakana ingkita mangapa'amani tee Aulata'ala.

¹¹ E manga witinai imaasiakaku, ande o Aulata'ala mangamaasiaka mpuu, sumaimo ingkita tabeana tapomaamaasiaka uka.

¹² Inda samia uka mopadhana mokamatana Aulata'ala, maka ande tapomaamaasiaka, sumaimo Aulata'ala amboore i nuncana karota tee o kaasina Aulata'ala atopamondo i nuncana dhadhita.

¹³ Tee mboo sumai, ingkita tamembali tamataua ande ingkita tadhadhi taposaangu tee Aulata'ala tee Incia aposaangu tee ingkita, siitumo alaloi Rohi mopadhana idhawuakana to ingkita.

¹⁴ Tee ingkami uka padhamo takamatea tee tadhawu kasakusii ande o Ama padhamo alamboko Anana to amembali Mopasalaamatina dunia sii.

¹⁵ Incemapo uka momangakuna, "Iaku kuparacaea ande o Isa sumai satotuuna o Ana moubana minaaka i Aulata'ala," sumaimo o Aulata'ala adhadhi aposaangu tee incia, tee incia aposaangu tee Aulata'ala.

¹⁶ Jadi ingkita tamataua tee taparacaea ande o Aulata'ala mangamaasiaka.

Aulata'ala sumai o kaasi, tee incemapo motorotorosuna momaasiakana Aulata'ala tee manga witinaita, sumaimo incia aposaangu tee Aulata'ala, tee o Aulata'ala uka amboore i nuncana karon.

¹⁷ Tee cara mboo sii o kaasina atopamondo i nuncana karota, mamudhaakana ingkita tabarani i eona kahaakimu, roonamo i nuncana dhadhita i dunia sii apokana mboomo dhadhina Al Masi.

¹⁸ Ande o kaasi sumai adhaangia i nuncana ngangarandata, sumaimo ingkita inda bheta-maeka tee kahaakimuna Aulata'ala. Roonamo mia momaasina tee mpuu-mpuuna incana apaila kaekana. Incemapo uka momaekana to a'adilia Aulata'ala ma'anana incia dhaangiapo aabhi karon alaenga to atohukumu. Mia momaekana to atohukumu ma'anana kaasina indapo atopamondo.

¹⁹ Ingkita tamembali tamaasiaka Aulata'ala atawa o mia mosagaanana, giu incia sumai tamembali tapewaua roonamo Aulata'ala padhamo aporikana mangamaasiaka.

²⁰ Ande dhaangia o mia mopogauna, "Iaku kumaasiaka Aulata'ala," maka incia inda amaasiaka witinaina, mia incia sumai o pande gau-gau. Roonamo ande incia inda amaasiaka witi-

naina momembalina ikamatana, tuaapa amembali amaasiaka Aulata'ala indapo sampeampearo ikamatana?

²¹ Tee o parinta incia sumai mopadhana idhawuakana Aulata'ala, siitumo incema-incema momaasiakana Aulata'ala, incia uka tabeana amaasiaka witinaina.

5

Mia Moko'iimani Atalo Dunia

5:1-5

¹ Incema-incema moparacaeana ande o Isa sumai o Al Masi, ma'anana padhamo atarima dhadhi mobhaau minaaka i Aulata'ala. Tee incema-incema momaasiakana Aulata'ala modhawuakana dhadhi mobhaau sumai, incia uka tabeana amaasiaka mia motarimana dhadhi mobhaau sumai.

² Tee caramo mboo sii ingkita tamataua ande ingkita tapomaamaasiaka tee manga anana Aulata'ala, siitumo podho-podho ingkita mopadhana motarimana dhadhi mobhaau minaaka i Aulata'ala, ande ingkita tamaasiaka Aulata'ala sumaimo ingkita tapewaua manga parintana.

³ Roonamo tamaasiaka Aulata'ala o ma'anana ingkita tata'ati manga parintana tee ingkita inda tanamisia amatamo manga parintana sumai,

⁴ roonamo bhari-bharia mia motarimana dhadhi mobhaau minaaka i Aulata'ala adhawuakea kuasa to apekatalo manga giu madhaki i dunia sii. Tee kakaa mopamembalina ingkita takana minaaka i manga giu madhaki i dunia sii, siitumo iimanita tee Isa.

⁵ Incema buaka o mia momembalina motalona dunia, ande mencuana mia moparacaeana Isa o Anana Aulata'ala?

Kasakusiina o Anana Aulata'ala

5:6-12

⁶ Isa Al Masi padhamo aumba i dunia tee asusuaka rua tanda minaaka i Aulata'ala, siitumo uwe tee raa. Isa Al Masi aumba mencuana soo alaloi uwe kapapebhahokana, maka aumba alaloi uwe tee raa,* tee o Rohina Aulata'ala karoni mosakusiiakana giu incia sumai abanara, roonamo Rohi inda agau-gau.

⁷ Satotuuna dhaangia talu giu momembalina sakusii,

⁸ siitumo o Rohi, uwe, tee raa, talu-talu angua adhawu kasakusii mopokana pokaina tee Isa.

⁹ Ande taparacaea tee kasakusiina maanusia, sumaimo alabhi o kaogena kaparacaeata tee kasakusiina Aulata'ala, roonamo giumo incia sumai o kasakusii mopadhana idhawuakana Aulata'ala pokaina tee Anana.

¹⁰ Incema-incema moparacaeana tee Ana moubana minaaka i Aulata'ala, manga incia padhamo atarima kasakusii sumai i nuncana ngangarandana, maka incema-incema inda moparacaeana Aulata'ala, sumaimo incia aabhi Aulata'ala agau-gau, sababuna incia inda aparacaea tee kasakusii ipakawaakana Aulata'ala to Anana.

* **5:6 5:6** *uwe tee raa*: Aipomo Yahya apogauaka rua angu kajadia wakutuuna Isa atopapebhaho tee wakutuuna Incia atoloe i kau salib.

¹¹ Siimo kasakusii sumai, Aulata'ala padhamo adhawuaka to ingkita o dhadhi mobakaa, tee o dhadhi sumai adhaangia i nuncana karona o Anana.

¹² Mia motarimana Ana moubana minaaka i Aulata'ala, incia atarima dhadhi, tee o mia inda motarimana Anana Aulata'ala inda atarima dhadhi.

Katau Pokaiana tee Dhadhi Mobakaa
5:13-21

¹³ Iaku kuburi giu incia sii to ingkomiu mopara-caeana tee sarona o Anana Aulata'ala mamudhaakana ingkomiu umataua ande ingkomiu utarima dhadhi mobakaa.

¹⁴ Rampaakanamo sumai ingkita tabarani taemani i Aulata'ala, roonamo tayaakini ande ingkita taemani opeapo uka i Incia mboomo opea ipeeluna, tantumo Incia mangarango.

¹⁵ Roonamo ingkita tamataua, ande Incia aperangoi opea iemanita, sumaimo tamataua uka, ande ingkita padhamo tapotibhaaka bhari-bharia giu mopadhana iemanita i Incia.

¹⁶ Ande ukamata witinaita apewau dosa inda moubbaakana mate, incia tabeana ado'a i Aulata'ala, tee o Aulata'ala bheadhawuakea dhadhi to incia tee manga mia mopewauna dosa inda moubbaakana mate. Maka dhaangia uka o dosa moubbaakana mate. Pokaiana tee dosa mboo sumai, iaku inda kupogau ande ingkomiu tabeana udo'aakea.

¹⁷ Bhari-bharia giu madhaki satotuuna o dosa, maka inda bhari-bharia dosa aumbaaka mate.

¹⁸ Ingkita tamataua ande o mia motarimana dhadhi bhaau minaaka i Aulata'ala inda atoro-torosu apewau dosa, roonamo Anana Aulata'ala mojagania. Tee mboo sumai Ibilisi inda bheape-wau kadhaki tee incia.

¹⁹ Ingkita tamataua ande ingkita tamembalimo o anana Aulata'ala moomini bhari-bharia mia i dunia sii akuasaia Ibilisi.

²⁰ Maka ingkita tamataua, ande o Anana Aulata'ala aumbamo tee mangadhawuaka akala mamudhaakana tamataua o Aulata'ala Mobanara. Ingkita tadhadhi tee taposaangu tee Incia roonamo ingkita taposaangu tee Anana siitumo Isa Al Masi. Incia uka o Aulata'ala mobanara tee alaenga atoparacaea tee Incia minaanamo dhadhi mobakaa.

²¹ E manga anaku, jagania o karomiu minaaka i manga barahala.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 10 Jul 2025 from source files dated 10 Jul 2025

7df9af1f-1c49-59d2-a164-bde0a20127b3